



# Fai ma Sui o Iesu

## Saunia e Mikaela Wilkins

(E faavae i se tala moni)

Sa nofo Tavita i le laina pito i luma o le falesa ma luelue lona vae. Sa popole o ia. Faatoa ia tuua lava le Peraimer i ae avea ma se tiakono. O le a faaali atu e tama matutua ia Tavita ma isi tama e 11 tausaga le matutua le auala e tufa ai le faamanatuga.

O nisi taimi o luitau o le tuputupu ae faaleaga-fesootai, tautala ma amio masani (autism) o Tavita na faigata ai ia te ia ona aoao ni mea fou. O le siitia ese mai le Peraimer sa faigata mo ia. Ma o lenei ua foliga mai ua taufaafele le tufaina o le faamanatuga. Ae faapefea pe afai na te faia se mea sese ma talie tagata uma ia te ia?



Sa nofo Iakopo, o se tasi o tama matutua, i autafa o Tavita. "Ua matou fiafia e faatasi ma oe," na fai atu ai Iakopo. Sa ia tuuina atu ia Tavita se pati maualuga. "O le a e lelei tele."

Sa ataata Tavita. O lona mea na ia maua ai sina lagona sili atu.

Sa faaali atu e isi alii talavou i le au ta'i 11 tausaga le matutua le mea e fai. Sa latou faaali atu ia i latou le mea e o i ai ma laina e pasi atu i ai. Sa latou faataitai ona savavali i lalo i ala-savali i le falesa. Sa latou faaali atu i tama le auala e uu ai fata o le faamanatuga.

"Tina, vaai!" Na fai atu ai Tavita ina ua ia taunuu i le fale. Sa ia sii i luga lona lima. "O le auala lenei ou te uuina ai le fata.

Faeteete, faapea. Ona o loo ou fai ma sui o Iesu, ma ou te manao e faaali atu lo'u faaaloalo."

Sa faataitai alii talavou faatasi ma Tavita ma isi tama i le tuua o le lotu i Aso Sa ma gaoioiga i po o le vaiaso. Sa latou savavali i le mea e tatau ona latou o i ai. Sa faataitai e Tavita le uuina o le fata.

E le'i umi, ae oo mai le aso o le a ia tufaina ai le faamanatuga mo le taimi muamua.

"O le a sou lagona i ai?" O le fesili lea a Tama.

"O loo ou popole pea," o le tala lea a Tavita.

"Ta talanoa i mea ua e faia e saunia ai," o le tala lea a Tama.

"Ia, ua uma ona matou faitau i tusitusiga paia e uiga i le perisitua o se aiga," o le tala lea a Tavita. "O le umiaina o le perisitua o lona uiga o a'u e fai ma sui o Iesu. Sa ou otiina o'u atigilima ina ia foliga manaia o'u lima. Ma ua ou faataitaia soo!"

"Ou te manatu ua e saunia lelei," o le tala lea a Tama.

Ina ua ia taunuu i le lotu, sa nofo Tavita i le laina pito i luma faatasi ma isi tiakono. Sa nofo Iakopo i ona autafa. Sa mafaufau Tavita i le ala e avea ai o ia ma sui o Iesu ina pe a ia tufaina le faamanatuga. Ae faapefea pe afai e sasi pea o ia? Sa tepa atu o ia ia Iakopo, ma sa ataata atu Iakopo ia te ia. Sa ataata atu

Tavita ma manava loloa.

Ina ua oo i le taimi e tufa ai le faamanatuga, sa fesoasoani Iakopo ia Tavita e pasi atu le fata i nai atulaina muamua. Sa fiafia Tavita i le i ai o se tasi faatasi ma ia.

Sa tilotilo atu Tavita i tagata a o ia tufaina le faamanatuga. O le toatele o i latou sa nonofo ma o latou ulu o punonou ma le migao. O nisi sa foliga o mafaufau loloto. Sa lagona e Tavita le toafilemu. Sa fai o ia ma sui o Iesu. Sa faafetai o ia ona sa ia fesoasoani i isi e mafaufau e uiga ia Iesu Keriso. ●

*O lenei tala sa tupu i le ISA.*

